



Mathilda Schmid- Halter

11-05-1917 tochen 08-05-2005

Mathilda Schmid-Idalter ei naschida ils 11 da matg 1917 a Valatta. Ensemen cun tschun fargliuns passenta ella ina affonza bein survigilada mo era mudesta. Mathilda po buca spitgar da saver ir a scola. Sia tenuta d'emprender e dad instruir meina ella la finala sillia via da magistra. Per puder realisar quella finamira fa ella tut il temps d'uiara studegia

ella egl institut da soras ad Ingenbohl. Per saver finanziar ses studis sto ella luvar el temps liber en differents loghens. Cun grond interess ed engaschi pren ella part dallas differentas purschidas digl internat. Adina puspei e tochen sia mort raquenta ella da quei interessant e bi temps. Ella finescha ad Ingenbohl sco scolasta primara e sco scolasta da lavurs manilas. Suenter frequenta ella il studium da pedagogia curativa a Friburg e dasperas instruescha ella ina giuvna suorda e metta. Per saver dar scola el Grischun fa ella la patenta grischuna da scolasta. Da 1946 tochen 1949 surpren ella la scola cumplexiva a Selva. Quei ei stau in bi e custeivel temps familiar, schibein per scolaras e scolars sco era per la scolasta Mathilda. Duront quei temps empren ella d'enconuscher siu um, il Vigeli Schmid, il pec da Rueras. 1949 maridan els e realischan ensemen lur plans. Il Vigeli ha gronda capientscha e su-stegn zun fetg l'idea da sia consorta da fundar ina scola privata per carstgauns cun impediments. Era dalla gli-eud dil vitg e dalla Val astga la pecca sentir toleranza ed acceptanza pil project. Aschia ei la pintga peccaria sesviluppada plauenet tochen tier la casa Soldanella dad oz, in liug da tgira e sustegn per carstgauns cun impediments da tgierp e da spért. Naven da 1950 tochen 1958 crescha la famiglia, treis feglas e dus feglis. La Mathilda meina la casa Soldanella e s'engascha dasperas aunc intensivamein ella veta ordeifer la Soldanella. Aschia surpren ella differents uffecis politics, sozials ni educativs. Igl onn 1971 miera anetgamein siu um Vigeli e fa ina nundetga largia ella famiglia. Mo cun ina ferma cardientscha e muort las finamiras tschentadas ei quella frida da surmuntar. La dira sort vegn era levgiada cul sustegri dalla famiglia, dallas emploiadadas ella casa Soldanella, dils commembres dalla Uniu Casa Soldanella e dalla entira populaziun indigena. Suenter sia pensiun sa la Mathilda far la «tatta» per biadias e biadis, per la sutbiadia ed il sutbeadi e per tut quels che giavischon siu contact. Quei

niev pensum fascinescha ed empleina ella. Ella organisescha fiascas e giubileums e porscha acziuns e rituals a tut. Da quella fontauna survegn Mathilda la forza da cumbatter la malsogna da canzer che veva tuccau ella. Da cheu vegn era l'energia ed il humor dalla tatta Mathilda. Tochen la fin ein humor ed enargia stai dus fideivels cumpogns. Il di dallas mummas, ils otg da matg, ei il rudi dalla veta seserraus en sia casa Soldanella. Lein mantener la Mathilda en buna memoria.

Tia famiglia